


mopatanaltij iyixco ken kita' kichij ikójkol iga kinekiá nō makimikti. E' como aya tajpalej in koyotzin, akitajpalaxilij in masa'. Iga masa' pox tajpalej iwán masa' kixilij in koyotzin. Iwán koyotzin ne-iga wetzito, este lotzkinawati', este mokatzajtzi'.

Masa' choloj iwán koyotzin ompa wetzikawi'; este ipan se'ya día tzikamej kixitijkej koyotzin iga kijtojkej anka míkto'ya, ijkón iga tajlantikisa' iwán mopejpentiketza' iwán kijtoj:

Ayompa nikchij iga niwalaj noselti, nej aya nitajpalej ken tajpalej nokójkol tekuani. Inán nia niktemoti nokójkol tekuani iga manikpowili iga ne-ixilij masa'.

Inón iga inán kua' tiawij pan kuayoj o pan ixtawakyoj tikakij tzajtzi koyo' iga kitemojtinemi ikójkol.



## Koyo-ilamaj iwán ipiltzin


Íkyaki' onoya se koyo-ilamaj yej kipiaya se ipiltzin yej aya yolej.

Se día iyomextimej némiya mayamikiáj iga akipiayaj te kikuaj. Iwán koyo-ilamaj kijlij ipiltzin:

—Nopíj, xaj xikitati mokójkol tekuani iga mamitznextili kén iga wel xitatojtoka. Siga atiktemowa kén iga wel matitakuakan tiawij timayamikitij.

Iwán inín koyotzin yajki kitemoto ikójkol. Kua' asi' itenoj ikójkol, kijtoj koyotzin:

—Nokójkol, niwalaj nimitzijliko iga achi xinenextili kén iga wel manitatojtoka, nej wan noye' nemi nimayamikij. Notaj mi'ya wan ayagaj netatemoliáj iga manitakuakan.



Tekuani kijtoj:

—Kena wel, siga tej ijkón tikneki, Sémiya nokta tiawij titatojtokatij; tiawij tikchatij masa' kan panowa.

Iwán yajkij iyomextimej tatojtokatoj. Kua' ompígaya onokej, kichakej kan panowa masa'.

Iwán tekuani kijlij koyo':

—Kua' tikitas iga kisákoya masa', xikíztosan kén iga nia nimopatánaltiti iyixko kua' nia nikitzkiti.

Iwán iyomextimej yajkij tatojtokatoj.

Asikej kan panowa masa', iwán ompa kichakej.



Kua' nemi panowaya in masa', tekuani mowejpatánaltij iyixko masa' iwán kimiktij.

Iwán koyotzin kitztoya kén iga ikójkol kimiktij masa', iwán kijtoj pan iyalmaj:

—Inán nikíta'ya kén iga momiktiá masa', inán se' día níwi'san noselti iga inán nimixkuítija ipan nokójkol.

Iwán iyomextimej mokuilijkej ajachi inón masánaka' iwán paktiájkija ichamej. Panoj nawi tanes kijtoj koyotzin:

—Inán nia sej nitatojtokati, e' ayo' niati wan nokójkol, inán niati noselti.

Iwán koyotzin ojku' iga yajki tatojtokato iselti.

Kua' asi' kan panowa masa', motalij iga kichá' mapano masa'.

Awejkaj iga kichixtoya, wejkisako se masawéj; kua' koyotzin kita' in masa',

